

# 1 Yonee To Yoneeye hogugu

## *1 Yonee booka goo eyo bei*

Gamenee goo eligili odoo oso sosee susuga mapoo eligimo silesibulone, Yesuye odoo su toloso mi hamapoo sile dee takomo silesibiliso. Osoloso diayo eligi eyo kulodu goo tokenee talai goo ee haga goo toowanee, dee takomo silesibiliso. Osoloso emegei pidilei sabolo haga goo toowanee deliso. Diayo eligi goo hageesi eligimo silesibume, Yesu o hamamee dili odoo hee, Yonee olo adaga poloso badolone, goo hagee ogoloso to hogugu hagee sosee susuga mapoo teneeso. Bei, Yonee goomegele tei telaga odoo sosee susuga mapoo egee do oso see gamenee goo eligili odoo oso eligi mapoo hamamee deedeeyaga. Esino diayo daga Kelisowo goo du ee medee kibiya toloso dabalame, yo goomogaso.

## *Yesu yo gie badeli teneli to oso*

<sup>1</sup> Iyo nimapoo gie badeli teneli to eyo goo hoguga. Goo ee daga bei mooloogoo mapoo yo badebeiso. Iyo o goo duloso ibada howoso yo tei egeiso. Osoloso ibada deeso yo sigeso.

<sup>2</sup> Gie badeli oso woola yiligebugume egeiso. Esiga iyo yo tei egeiso. Kookaiyo gie badeli yimapoo moloso, esiga iyo nimapoo woola ka taka. Yo daga Ma Godeebolo badebeiso. Osoloso yo imapoo yilige buguso.

<sup>3</sup> Esiga iyo duloso egei goo ee nimapoo ka taka, niyo ibolo hedebe dalame. Osoloso iba Ma Godee sabolo owolo Yesu Keliso sabolo hedebe doloso doso.

<sup>4</sup> Esiga iyo goo hamaga nimapoo osoloso imapoo goomoga goo oso kauwuloso malame, to hagee hoguguloso ka teneeso.

### *Godee yo gadeebugu*

<sup>5</sup> Esiga iyo Keliso maga du goo ee see nimapoo hagee yilige buguso. Goo ee, Godee yo gadeebugu. Yimapoo neliga hee mauwe.

<sup>6</sup> Egeesi ma kulodu odoo susuga iyo takolone, iba Godee sabolo hedebe deliso doloso, see neliga ma kulodu silesiboga, iba wulo gamenee takooso. Esiga iba tei goo koo deedeeso.

<sup>7</sup> Esino Godeeye gadeebugu ma kulodu egee bado egeese badolone, iba see gadeebugu ma kulodu dogo, oso tei telaga odoo iba susuga hedebe doloso dobolone ka salai. Egeeseega owolo Yesuwo sawo oso ibada tokenee susuga hapoloso tabigileiso.

<sup>8</sup> Egeesi ma kulodu iyo takolone, “Iba tokenee mauwe odoo,” dee takooga, iba iso nediliyo gameenee takooso. Esiga imapoo tei goo mauwe.

<sup>9</sup> Esino iyo ibada tokenee goo ee Godee mapoo yilige buguga, yayo ibada tokenee goo ee hapoloso boobado bigileiso, osoloso goo tokenee susuga hapoloso iba Godeeyo howo woola see

medee teedee moodoolaiso. Bei, yayo o to kitulugu magoo ee dodolone, hooda hedebe tei goo moodoolaiso.

<sup>10</sup> Osoloso iyo takolone, “Iba tokenee goo koo teli,” dee takooga, iyo Godee yo gamenee takeli odoo dolone ka salai. Egeesi maga Godeeyo to oso ibada sooloo ma kulodu koo moloso.

## 2

### *Keliso ee iba pidili*

<sup>1</sup> Mawe dio ayo gooma, niyo goo tokenee teyaga, hogugu hagee nimapoo ka tonowa. Esino nima kulodu odoo heeso tokenee toga, niba goolee. Odoo heeso ima hodiokooga toboloso iba halo Godee mapoo takoomoloso, odoo ee medee teedee odoo Yesu Kelisoso.

<sup>2</sup> Esiga Kelisoye ibada goo tokenee maga taso. Egeesi maga goo tokenee susuga peegoo togobuguso, Godeeye imapoo nei tenelega pagalame. Esino hedebe ibada goo tokenee peegoo tabigilame tele. Haye, odoo susuga mipoo toowa mapoo debeli sabolo dibada tokenee peegoo tabigilame ka ta.

<sup>3</sup> Osoloso odoo susuga iyo Godeeye kokodo taka to mapoo mesimo silesiboga, iba yo gooleedooso doloso gooleedalaiso.

<sup>4</sup> Esino edebeeyo takolone, “Godee a gooleedooso,” dee takoloso, see yayo Godeeye kokodo taka to mapoo koo mesimo siloga, yayo wulo gamenee goo goolone ka seeso. Esiga odoo egeesi mapoo tei goo mauwe.

<sup>5</sup> Esino edebeeyo Godeeye kokodo taka to mapoo mesimo siloga, odo egeesi masi oso o sooloo ma kulodu Godee gweli goo ee kauwuloso moloso. Osoloso iba goo egeesi maga iyo tei Godee sabolo hedebe di goo ee gooleedeliso.

<sup>6</sup> Goo ee edebeeyo takolone, “A Godee sabolo hedebe doloso badoso,” dee takooga, odo yo Yesuye badebei egeesi masi badebee.

<sup>7</sup> Ayo gooma odo, ayo nimapoo kokodo takeli to hoguguloso hagee tenee goo ee dianee. Esino niyo daga tei toloso kokodo taka to ee hagoso. Bei, kokodo takeli to nape hagee niso daga hoogoo olo duso.

<sup>8</sup> Esino kokodo takeli to nape hamapoo goo dia onosee moloso. Bei, goo dia tei ee Keliso ma kulodu osoloso nima kulodu eligiso. Goo egeesi maga neliga mauwe poogoomo dime, gadeebugu moloso.

<sup>9</sup> Odo agayo takolone, a gadeebugu mapoo badoso doloso, tei too odo hee gowooga, odo ee neliga ma kulodu osee badoso.

<sup>10</sup> Esino odo agayo emegei tei telaga odo sooloo dologa, yo gadeebugu ma kulodu badoso. Esiga gadeebugu ee ma kulodu badolone, tei too odo hee tokenee mapoo homodobilame moodoolaime.

<sup>11</sup> Esiga ee ma kulodu odo agayo tei too odo gowoolone badoga, yo neliga ma kulodu badoso. Yo neliga ma kulodu badolone, eyo egee du eli koo ogoso. Bei, neliga goo oso o howo gooloogooga.

- 12 Esiga mawe dio ayo gooma, ayo to hogugu hagee nimapoo ka tonowa.  
Bei, nibada goo tokenee Yesu maga hapoloso boobado buguso.
- 13 Osoloso adaga nimapoo to hogugu hagee ka tonowa.  
Bei, niyo daga bei mooloogoo maga badebei odo Yesu ee niba gooleedooso.  
Osoloso see gie kakauwuga nimapoo to hogugu hagee ka tonowa.  
Bei, niyo tokenee odo Saiten sabolo ha too ee ma kulodu niyo olo dagadiso.  
Osoloso mawe dio ayo see to hogugu hagee ka tonowa.  
Bei, ibada ama Godee niba olo gooleedooso.
- 14 Osoloso adaga nimapoo to hogugu hagee see ka tonowa.  
Bei, niyo daga bei mooloogoo maga badebei odo Yesu ee niba gooleedooso.  
Osoloso gie kakauwuga nimapoo to hogugu hagee ka tonowa.  
Bei, niba kitulugu odo oso.  
Osoloso Godeeyo to oso nima kulodu mologa, niyo tokenee odo Saiten ee olo dagadileso doso.

*Mi toowa hageeyo goo mapoo  
goomegeli goo*

- 15 Esiga niba mi toowa hageeyo goo sabolo osoloso ee ma kulodu bi susuga egee molo mapoo haga na goomege. Edebeeyo mi toowa hageeyo goo mapoo diya goomogoga, o sooloo ma kulodu Ma Godee goolee goo ee mauwe.

<sup>16</sup> Esiga mi toowa hageeyo goo diya goomoga maga goo hagee peledabalaiso. Suso goomoga goo sabolo, osoloso mi toowa hageeyo kulodu bi egee molo ogoloso goomegeli goo sabolo, osoloso bi bei doloso badolone, si howeli goo sabolo. Esino goo susuga hagee Ma Godee maga koo sibili, esino mi toowa hagee eyo goo oso.

<sup>17</sup> Mi toowa hagee sabolo osoloso edebeeyo goomegeli goo susuga sabolo mauwe pagalaiso. Esino Godeeye goomoga goo tomo sili odoe ee badoboso kookaiyo osee badalaiso.

### *Keliso mapoo ha teli odoe*

<sup>18</sup> Mawe dio, biame hoo pagalai koola toobooso. Esiga Keliso mapoo ha teli odoe oso sibilei goo ee nimapoo olo takaso. Esino Keliso mapoo ha teli odoe abo epedee olo peledabaso. Egeesi maga biame hoo pagalai koola tooboo doloso iba ka gooleedoso.

<sup>19</sup> Esino odoe hagee bia daga ibolo hodobo siloso see iba poogoloso diso. Bei, diba tei ibolo hedebe doloso debele. Diba tei ibolo hodobo debei diepi, iba poogoo dile pegeliyo. Esino diayo iba poogoloso di oso tei diayo ibolo hedebe delega poogoo goo ee ka yilige buguso.

<sup>20</sup> Esino nimapoo Kelisoye Dio Tei olo teneeso. Egeesi maga niba susuga tei goo ee olo gooleedooso.

<sup>21</sup> Esiga ayo nimapoo hoguguloso epedee hagee tenee goo ee niyo tei goo gooleedelega dogaa koo

seeso. Esino tei goo ee niba olo gooleedooso. Bei, tei goo ee ma kulodu gamenee takeli goo mauwe.

<sup>22</sup> Osoloso gamenee takeli odoo ogumo? Ede-beeyo Yesu yo Kelisonee dee takooga, odoo ee gamenee takeli odoo oso. Esiga yo Keliso mapoo ha teli odoo oso. Bei, odoo hagoso Yesu yo Kelisonee dee takooga, yo Ma Godee sabolo osoloso owolo Yesu mapoo gowoolone miligi piaso.

<sup>23</sup> Esiga odoo agayo Godeeyo owolo Yesu mapoo gowoolone miligi piaga, yo Ma Godee sabolo hedebe doloso koo badoso. Esino edebeeyo Godeeyo owolo Yesuwo goo woola yilige buguga, yo Ma Godee sabolo hedebe doloso badoso.

<sup>24</sup> Esiga to tekepo daga niyo du mapoo tei toloso ka debee. To oso nibada sooloo ma kulodu mologa, Ma Godee sabolo osoloso owolo Yesu sabolo hedebe doloso dabalaiso.

<sup>25</sup> Esiga Kelisoye imapoo kookaiyo badoboso gie badeli tenelame to kitulugu magooso.

<sup>26</sup> Osoloso odoo aboso gamenee eligi goo eligimo silesiboga, ayo epedee o goo ee hoguguloso nimapoo ka tonowa.

<sup>27</sup> Esino nimapoo Kelisoye Dio Tei olo teneeso. Osoloso Dio Tei oso nibada kulodu badolone, niba ka eligimoloso. Esiga odoo heeso tei goo eligilei niba koo goomogoso. Bei, Dio Tei oso niba tei goo susuga olo eligimoloso. Esiga yayo eligi ee ma kulodu, tei goo ee eligilone, gamenee goo koo eligiso. Esiga niba Dio Tei oso eligi goo mapoo dodolone, Yesu sabolo hedebe doloso osee debee.

### *Godeeyo owolo dio*

<sup>28</sup> Esiga mawe dio ayo gooma, niba Keliso sabolo hedebe doloso osee debee. Egeesee seega yayo simi mapoo o mudugiyopaga kitulugu sabolo ebilega tebisileiso.

<sup>29</sup> Godee yo goo tekepo moodeli niba gooleedooso. Osoloso niba gooleedooso, goo tekepo tomo sili odoo ee Godeeyo owolo dio doloso doso.

### 3

<sup>1</sup> Esiga ibada Ama Godeeye iba susuga diya sooloo dala goo toowa goo ee medee goolee! Yayo sooloo dala maga iba yayo owolo dio deliso. Esiga iba tei owolo dio doloso doso. Esino mi toowa goomegeli odoo oso Godeeyo goo diba gooleedele. Goo egeesi maga diba ibada goo gooleedele.

<sup>2</sup> Esiga emegei, iba Godeeyo owolo dio doloso doso. Esino iba medee gooleedele, iyo hamamee dabalai goo ee. Esino iba gooleedooso, Keliso siboga, iba see yo masi palaiso. Bei, iyo tei yo agalaiso.

<sup>3</sup> Esiga edebeeyo goo hamapoo bolone dulone badoga, odoo oso tokenee mauwe Keliso masi badalai tekepo.

<sup>4</sup> Esiga edebeeyo goo tokenee tomo siloga, yayo Godeeyo tei magoo gabagamo siloso. Bei, tokenee goo ee tei magoo gababili.

<sup>5</sup> Niba olo gooleedooso, Kelisoye simi ee odoo susuga ibada tokenee hapoloso boobado bigilame ka simi. Bei, yimapoo tokenee hee mauwe.

<sup>6</sup> Edebeeyo Keliso sabolo hedebe doloso badoga, yo tokenee goo osee tomo sileime. Esino



edebeeyo tokenee goo osee tomo siloga, Kelisowo goo yo gooledele, osoloso yimapoo tei tele.

<sup>7</sup> Mawe dio ayo gooma, niba obeeyamo, odo aboso eligi maga niba peegoo na gilimado di dee. Goo tekepo teli odo ee Godeeyo howo woola tekepo badoso. Esiga yo Kelisoye Godeeyo howo woola tekepo egee bado yinosee egeesi badoso.

<sup>8</sup> Esino edebeeyo goo tokenee tomo siloga, yo Saiteneeyo odo. Bei, Saiten yayo daga bei mooloogoolone tokenee odo doloso badebei osee osee badoso. Esiga Godeeyo owoloye Saitenso tou teli ee guobigilame ka simi.

<sup>9</sup> Osoloso edebeeyo Godeeyo owolo doloso badoga, yo goo tokenee osee tomo sileime. Bei, Godeeyo tei gie badeli yima kulodu moloso. Esiga yayo see goo tokenee tomo silei tebile. Bei, yo Godeeyo owolo.

<sup>10</sup> Esiga goo hageesi maga iyo Godeeyo owolo dio sabolo osoloso Saiteneeyo owolo dio sabolo medee kibiya ka gooleedoso. Odo agayo tekepo goo telega poogooga, yo Godeeyo owolonee. Osoloso tei too odo sooloo delega poogooga, yo Godeeyo owolonee.

*Nei sooloo dolo, nei sooloo dolo dalai*

<sup>11</sup> Daga eligi goo niyo du hagoso. Esiga iyo nei sooloo dolo, nei sooloo dolo dolone dabalai tekepo.

<sup>12</sup> Esiga niba Keineeyo goo na peedee. Bei, yo Saiteneeyo odo doloso badolone, omolo woolomaso. Bei kasalame Keineeye omolo ka

wooloomayo? Bei, Kein yo goo tokenee tomo sili, esino omoloye Godeeyo howo woola goo tekepo tomo sili.

<sup>13</sup> Esiga tei telaga odoo emegei, tei tele poogoo mi toowa mapoo debeli odoo oso niba hegioga, haga na goolee.

<sup>14</sup> Osoloso iba gooleedooso, iyo tei telaga odoo sooloo dologa, iba teli maga see gie badeli mapoo dabagaso. Esino odoo agayo yimapoo sooloo dala goo mauwe daga, yo ta masi osee badoso.

<sup>15</sup> Osoloso odoo agayo tei telaga odoo hegioga, yo odoo wooloomali odoo oso. Esiga niba olo gooleedooso, odoo wooloomali odoo ee dibada kulodu kookaiyo badoboso gie badeli mauwe.

<sup>16</sup> Goo hamaga tei sooloo deli goo ee ka gooleedooso. Yesu Kelisoye iba halo o su teli mapoo magooso. Esiga iba noseet tei too odoo ee halo, ibada gie badeli peegoo magalai tekepo.

<sup>17</sup> Odoo yimapoo bi teiba oso tei too odoo bi mauwe badoga ogoloso, yo pidilega poogooga, o sooloo ma kulodu Godee goolee goo mauwe.

<sup>18</sup> Mawe dio emegei, iyo emegei sooloo dolo doloso wulo toso takalai tekeponee. Esino suso pidilone tei sooloo dalai tekepo.

*Godeeyo howo woola ebilega  
kitulugu sabolo dabalai*

<sup>19-20</sup> Esiga iyo emegei sooloo dologa, egeesi maga iyo tei Godeeyo owolo doloso do goo ee gooleedalaiso. Esino ibada sooloo maga goolee oso takolone iba tokenee odoo, dee takooga, iba

ebileime. Esino iba Godeeyo howo woola ebilega kitulugu sabolo dabalaiso. Bei, Godee yo toowa osoloso yayo ibada sooloo oso goolee dagadiso, osoloso goo susuga iyo moodeli yo gooleedoo.

<sup>21</sup> Esiga tei telaga odoe emegei, ibada sooloo maga goolee goo oso takolone, iba tokenee odoe, dee koo takooga, iba ebilega poogoloso Godeeyo howo woola dabalaiso.

<sup>22</sup> Egeesi ma kulodu iyo yimapoo woosaga, yayo goo ee imapoo tenelaiso. Bei, iyo yayo kokodo taka to mapoo mesiliso, osoloso yayo goomoga goo ee tomoloso.

<sup>23</sup> Esiga yayo kokodo takolone egeesee takaso, “Niba Godeeyo owolo Yesu Keliso mapoo tei te. Osoloso yayo eligi ee dodolone, emegei nei sooloo dolo, nei sooloo dolo dolone debee,” diso.

<sup>24</sup> Edebeeyo Godeeye kokodo taka to mapoo mesilone dodomo siloga, diba yibolo hedebe doloso badoso. Osoloso nei Godee dibolo hedebe doloso ka badoso. Osoloso iba gooleedooso, Godee ibolo hedebe doloso badoso. Bei, yayo o Dio Tei imapoo teneloso badoso.

## 4

### *Eligi goo susuga medee ege*

<sup>1</sup> Tei telaga odoe emegei, niba obeeyamo. Bei, gamenee goo eligili odoe bei mipoo toowa hamapoo olo silesiboso. Esiga odoe heeso sibilesi takolone, “Ayo eligi goo hagee eligimo silo Dio Tei maga siboso,” dee takooga, o to duloso yimapoo

saga tei na te. Esino niyo yayo egee eligimo silo tei Godee maga sibabeleso, medee hoodo ege.

<sup>2</sup> Esino niba diayo eligi eyo kulodu Godeeyo Dio Tei hageesee gooleedalaiso. Diayo eligi oso takolone Yesu Godee maga sibilesos odoos polosos mi hamapoo badebeisos daga, oso diayo eligi goos ee tei Godee maga sibosos.

<sup>3</sup> Esino odoos agayos takolone Yesu Godee maga sibilesos odoos ka peles, dees takooga, yayo eligi goos ee Godee maga sibilesos. Odoos ee ma kulodu Kelisos mapoo ha telis dios tokenees badosos. Esiga Kelisos mapoo ha telis dios tokenees mipoo toowa hamapoo sibilesosogos dees takemes dumelees ee olos sibilesos badosos.

<sup>4</sup> Mawes dios emegeis, niba Godeeyo owolos dios dolosos dosos. Esiga niyo gamenees goos eligilis odoos oso eligi dulosos o to mapoo tei teles poogoo oso, niyo dibas dagadisos. Beis, odoos susugas ibadas kulodu Dio Tei egees bados oso kitulugus oso tei teles poogoo mis toowa mapoo debelis odoos dimas kulodu dios egees bados oso kitulugus ees dagadisos.

<sup>5</sup> Gamenees goos eligilis odoos hagees bias Godees gooleedeles. Esiga biames susugas silesibulones mis goos ee eligimos silesibilis. Osolosos mis odoos Godees gooleedeles poogoo oso dibadas to mapoo medees dulisos.

<sup>6</sup> Esino ibas Godeeyo odoos dolosos dosos. Esiga tei Godeeyo odoos oso ibadas to medees dulisos. Esino Godeeyo owolonees oso ibadas to ees medees koo dulis. Goos egeesis magas Dios Tei sabolos gamenees takelis dios sabolos medees hoodos agalaisos.

### *Godeeye sooloo deli*

<sup>7</sup> Tei telaga odoo emegei, iyo emegei nei sooloo dolo, nei sooloo dolo dolone dabalai tekepo. Bei, sooloo deli goo ee Godee maga sibili. Esiga odoo agayo emegei sooloo dologa, yo Godeeyo owoloso, osoloso yo Godee gooleedooso.

<sup>8</sup> Esino odoo agayo emegei sooloo delega poo-googa, yo Godee gooleedele. Bei, Godee yo sooloo deli.

<sup>9</sup> Esiga Godeeye iba sooloo dala goo ee yebugulone owolo hedebe mipoo toowa hamapoo meiyedis, iyo yimaga kookaiyo badoboso gie badeli talame.

<sup>10</sup> Esiga tei sooloo deli goo hagoso. Iyo Godee sooloo deli goo osonee. Esino Godeeye iba sooloo dolone owolo meiyedis, ibada goo tokenee maga talame, osoloso goo tokenee susuga peegoo togobigilame.

<sup>11</sup> Tei telaga odoo emegei, Godeeye iba diya egeesee sooloo dalaso. Esiga iyo emegei nei sooloo dolo, nei sooloo dolo dolone dabalai tekepo.

<sup>12</sup> Edebeeyo Godee egele. Esino iyo emegei nei sooloo dolo, nei sooloo dolo dolone dogo, Godee ibolo hedebe doloso badoso. Osoloso yayo sooloo dala oso ibada kulodu kauwuloso malaiso.

<sup>13</sup> Esiga Godeeye o Dio Tei imapoo teneeso. Egeesi maga iba gooleedooso, iba Godee sabolo hedebe doloso badoso, osoloso Godee ibolo hedebe doloso ka badoso.

14 Osoloso Ma Godeeye owolo mipoo toowa hamapoo meiyee diso, yayo mi odoosoo gie badeli ee pidilone badalame. Osoloso iyo goosoo hagee ogoloso ka takomoo silesiboso.

15 Esiga odoosoo agayoo takolone, Yesu Godeeyoo owolo deetakooga, Godee yiboloo hedebe dolosoo badosoo, osoloso yinosee Godee saboloo hedebe dolosoo badosoo.

16 Godeeye iba diya toowa sooloo dala goosoo ee olo gooleedoosoo. Esiga iyo Godeeye iba sooloo dala goosoo mapoo tei tolosoo kibiya ka dosoo.

Godee yoo sooloo deli. Esiga odoosoo agayoo sooloo dolone badoga, yoo Godee saboloo hedebe dolosoo badosoo, osoloso nei Godee yiboloo hedebe dolosoo badosoo.

17 Iba goosoo midilei biame mapoo ebilega kitulugoo saboloo dabalame, Godeeye sooloo deli goosoo ee toowa polosoo imapoo teneeso. Bei, iba Kelisoo masi mi hamapoo ka dosoo.

18 Edebeeyoo Godeeye yoo sooloo deli goosoo ee gooleedoo daga, yoo ebileime. Esiga sooloo deli goosoo toowa polosoo egee molo oso ebili goosoo habigileiso. Esino iba Godeeye ibada tokenee eyoo nei tenelai mapoo obuga, yayo sooloo dala goosoo ee imapoo kauwule.

19 Iba susuga dobolone sooloo deliso. Bei, Godeeye daga malalo iba sooloo dalaga.

20 Osoloso odoosoo heeso takolone, “A Godee diya gweliso,” dolosoo see tei too odoosoo heiga saboloo badoga, yoo gameneetakeli odoosoo oso. Bei, odoosoo egeesoo masi oso tei too odoosoo yayo egeli sooloo dellega badoga, yoo Godee koo egeli kasee goolaiyo?

<sup>21</sup> Kokodo takeli to hagee Godeeye imapoo olo teneeso. Odo agayo Godee diya gooleega, emegei tei too odo sabolo diya sooloo dalai tekepo.

## 5

### *Godeeyo owolo mapoo tei talai goo*

<sup>1</sup> Esiga edebeeyo tei tolone Yesu Godeeye hesia Keliso daga, yo Godeeyo owolo oso. Osoloso odo agayo Ma Godee gooleega, yo Godeeyo owolo dio sooloo doloso.

<sup>2</sup> Iyo Godee diya goolone, yayo kokodo taka to mapoo mesiloso silesiboga, oso iyo Godeeyo owolo dio sooloo dala goo ee gooleedoso.

<sup>3</sup> Bei, iyo Godee gweli goo eyo bei hagoso. Iyo yayo kokodo taka to mapoo mesiloso silesibileiso. Osoloso yayo kokodo taka to ee imapoo haga kodianee.

<sup>4</sup> Esiga Godeeyo owolo dio oso diayo tei too maga mi goo oso kitulugu ee dagadilesi doso.

<sup>5</sup> Esiga odo agayo mi goo sabolo ha too kitulugu ee ka dagadiyo? Edebeeyo Yesu Godeeyo owolo dolone tei toga odo oso, mi goo sabolo ha too kitulugu ee dagadilesi badoso.

### *Kookaiyo gie badeli Yesu mapoo moloso*

<sup>6</sup> Osoloso Yesu mi hamapoo sibileso, Godeeyo owologo dalame howo oluguso. Osoloso homo bulubo magoo mapoo tolone o sawo sologo buguso. Esiga Yesuye mi hamapoo simi ee hedebe howo olugulame sibile. Esino howo oluguloso

sawo sologobigilame ka simi. Osoloso Dio Tei oso tei goo hagee imapoo takooso. Bei, Dio Tei oso hedebe tei goo ee takemeliso.

<sup>7</sup> Esiga goo bakadio hedebe di hagoso Kelisowo goo ka eligiso.

<sup>8</sup> Goo ee Dio Tei, osoloso howo olugu, osoloso sawo sologo bugu goo oso imapoo Kelisowo goo ka yilige buguso. Ee ma kulodu goo bakadio hedebe di oso goo hedebe eligiso.

<sup>9</sup> Esiga edebeeyo egei goo ee imapoo yilige buguga duloso, iba tei teliso. Esino ee ma kulodu Godeeye imapoo egee takoo goo diya toowa. Esiga iyo duloso medee kibiya kookoodalai tekepo. Bei, yayo imapoo owolowo goo ee tei goo takaso.

<sup>10</sup> Esiga odoo agayo Godeeyo owolo mapoo tei toga, Godeeye owolowo goo maga tei goo taka to mapoo o sooloo ma kulodu tei too osee moloso. Esino odoo agayo Godeeye owolowo goo mapoo tei goo taka to mapoo tei telega poogoo odoo oso Godee gamenee takeli odoo, deliso.

<sup>11</sup> Esiga Godeeye imapoo owolowo goo mapoo tei taka to hagoso. Godeeye imapoo badoboso kookaiyo gie badeli teneeso. Gie badeli egee owolo Yesu maga imapoo ka teneli.

<sup>12</sup> Osoloso edebeeyo owolo Yesu mapoo tei toga, yimapoo gie badeli egee olo moloso. Esino odoo agayo Godeeyo owolo mapoo tei telega poogooga, yimapoo gie badeli egee mauwe.

### *Yoneeye to hamameedee taka*

---

**5:8:** Yon 15:26

**5:9:** Yon 5:32-37

**5:10:** Yon 5:36-40; Gal 4:6

**5:12:** Yon 3:36



<sup>13</sup> Esiga ayo Godeeyo owolo mapoo tei telaga odo o nimapoo to hogugu susuga hagee ka tonowa, niyo badoboso kookaiyo gie badeli too goo ee gooleedalame.

<sup>14</sup> Esiga iba gooleedooso, iyo Godee yimapoo takolone iyo goomoga goo ee yayo goomoga goo sabolo tobuloso woosaga, yayo ibada to duleiso.

<sup>15</sup> Egeesi ma kulodu yayo iyo yimapoo taka duso doloso, ogo o goo yimapoo woosaga, yayo goo ee imapoo teneliso.

<sup>16</sup> Esiga edebeeyo emegei tei too odo o oso telega pagalai tokenee tomolo ogoga, yayo Godee mapoo takalai tekepo, Godeeye o gie badeli pidilame. Esiga ayo hagee takoo goo ee, odo o teli mapoo koo ido dili goo ee taka. Esino teli mapoo ido dili goo tokenee moloso. Esiga ayo hagee takoo goo ee, teli mapoo ido dili goo tokenee teli odo o ee halo Godee mapoo takalame ayo koo takooso.

<sup>17</sup> Tekepo goonee susuga egee, tokenee goo oso. Esino tokenee susuga oso teli mapoo koo ido dili.

<sup>18</sup> Esiga iba gooleedooso, edebeeyo Godeeyo owolo doloso badoga, yo goo tokenee osee tomo sileime. Bei, Godeeyo owolo Yesu yayo yo medee bamoloso. Osoloso tokenee odo o Saitenso yo tokenee palaime.

<sup>19</sup> Esiga iba gooleedooso, iba Godeeyo owolo dio. Esino imaga mi toowa ma peego egee do Saitenso bamoloso.

<sup>20</sup> Osoloso see iba gooleedooso, Godeeyo owolo olo simiso. Osoloso yayo imapoo goo gweli medee tekepo olo teneeso, iyo tei Godee gooleedalame.

Esiga iyo tei Godee sabolo, osoloso owolo Keliso sabolo hedebe doloso doso. Esiga Yesu tei Godeeso. Osoloso kookaiyo badoboso gie badeli yimaga imapoo ka teneli.

<sup>21</sup> Esiga mawe dio emegei, niba medee badolone gamenee godee maga peegoo dooboobigi.

**Godeeyo To Tekepo**  
**Portions of the New Testament in the Odoodee**  
**language of Papua New Guinea**  
**Sampela hap Nupela Testamen long tokples Odoodee**  
copyright © 2006, 2015, 2017 Wycliffe Bible Translators, Inc.

Language: Odoodee

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-30

---

PDF generated using Haiola and XeLaTeX on 18 Apr 2025 from source files dated 31 Aug 2023

ffb0eddd-0f6e-5201-89ab-6fcbfcaebeba